

---

# *La Pagina*

---

*da Surmeir*

25 onns La Compagnia Rossini: concert da giubileum a Lucerna

## **Bombastic an tots**



**Tiers igl grond success è La Compagnia Rossini restada modesta e chegl ins ò constato er siva digl concert grondious aint igl Center da cultura e congress a Lucerna.**

**G.N.S. En pi bel regal vess La Compagnia Rossini betg savia far agls sies ameis. Scu finiziun digl onn da giubileum ò la furmaziun concerto aint igl Center da cultura e congress a Lucerna. Cant e musica sen ot nivel u detg oter en veir deletg musical.**

La Compagnia Rossini, totga gio dadei tar egna dallas furmaziuns da cant popularas. Igl ensemble sursilvan è da renom internaziunal, cunaschaint er ordvart igl cantun e la Svizra e perfign an America. En quart tschentaner stat la furmaziun sot la direcziun capavla d'Armin Caduff. Igl musicist è betg angal igl «grande maestro» mabagn arranscha el er canzungs per La Compagnia Rossini.

El ò en dung spezial ed adattescha las canzungs allas forzas digl sies chor. Ultra da chegl dat el gronda peisa alla scolaziun da cant e musica, uscheia tgi mintga commember e commembra dalla furmaziun ò ena fitg bunga basa fundamentala. Igl crap da fundamaint pigl success è sto igl 1980

cun la fundaziun digls Trubadurs Sursilvans. Gion Schwarz, igl proprietari digl hotel Cucagna a Muster ò gia l'idea da cumbinar ena bunga tschagna cun bellezza cant e bela musica. Per da lez taimp ena novaziun tiers tgi da chellas occurrenzas davigl gio an Engaltera e digl taimp dalla renaschientscha. Igl hotelier sursilvan ò gia raschung e siva digl 1986 ò La Compagnia Rossini ambellia musicalmaintg «La Cena è pronta» passa 200 gedas.

### **Diversas gedas an Surmeir**

Contribuia fitg bler agl success dalla furmaziun sursilvana ò er Lisabet Caduff, la donna d'Armin Caduff. Cun ella ò igl musicist catto en'organisatoura eccellente, ena cantadoura grondiosa, e la bung'olma dalla famiglia e da La Compagnia Rossini. Igl ensemble dalla Surselva è betg angal cunaschaint ainten las otras regiuns digl Grischun, mabagn er an Surmeir. Bleras gedas ò la furmaziun delecto igl publicum aint igl hotel Danilo a Savognin e varsaquantas gedas er concerto a Lai e Valbella. Tant igls giasts scu er igl indigens da Surmeir èn rivos an rotschas per vaseir e santeir la furmaziun cantica.

### **Prominenza e blers Rumantschs**

Igl punct culminont dalla festività d'en quart tschentaner è sto dumengia passada a Lucerna. Igl Center da cultura e da congress KKL era ple tgi fullano. 1800 persungas èn stadas perdetgas d'en concert bombastic. Tranter igl auditori eran blers prominents dalla politica, dall'economia, da sport e dalla gastronomia. Adolf Ogi, igl anteriour cunsiglier federal è er sto dalla parteida e scu blers oters sto incanto digl concert. Rivos an rotschas èn er igls Rumantschs per far onour alla giubilara. L'egn u l'oter è sto dumengia seira losch d'esser en Rumantsch surtot percheigl tgi la furmaziun concertanta dereiva er dalla Rumantscheia.

### **Finale cun Gion Jäger**

Igl concert da giubileum ò cuzzo treis ouras. Antschet ò chel cun ena «Sinfonia di benvenuto» da Rossini interpretada digl ensemble inclus igl chor. Accumpagnea agl clavzign ed agl orgel è la furmaziun neida d'Eric Christen e Christoph Demarmels, uriund da Salouf. Igl concert ò cumpiglia ena retrospectiva digls gronds success digls davos 25 onns. En toc tg'ò catto gronda accoglientscha è sto «Il Trovator» da P.J. Tschaikowski, interpreto excellent da solists e digl antier chor. Igl antier concert è sto da nivel fitg ot e tant igls pianos scu igls fortes èn nias interpretos sobers e fegns. Surtot la soprannista Anica Defuns, ò fatg surstar igl auditori cun sia vouch magnifica. Curt avant las 20.00 è sto igl grond final e per chel ò Armin Caduff, anvido divers anteriours commembers da La Compagnia Rossini, sen tribuna. Tranter chels er Gion Jäger, igl bariton surmiran tg'ò contribuia blers onns agl success dalla furmaziun, cun sia vouch imposanta.

### **Applaus frenetic e rosas cotschnas**

Igl concert aint igl KKL a Lucerna è sto en angraztgamaint agl auditori fidevel digl ensemble e surtot per chels tg'on purschia diversas gedas tetg alla furmaziun. Igl auditori è sto fascino digl concert ed er dall'austica eccellente dalla sala. Igl publicum ò angraztgea cun en lung applaus frenetic e La Compagnia Rossini ed igl chor on sessour regalo a mintga donna ena rosa cotschna scu simbol d'angraztgamaint. An chel senn pigl giubileum sincera gratulaziun er da Surmeir e surtot tot bung pigls proxims 25 onns. Las vistas èn ple tgi bungas cun esser integros gio oss aint igl ensemble Maria Catarina e Flurin Caduff, dus digls unfants da Lisabet ed Armin Caduff.